

TEZAUUR LITURGIC
20 SEPTEMBRIE

ACATISTUL
SF. CNEAZ
OLEG
DE LA
BRIANSK



MOSCOVA, 2000



АКАФИСТ

Преподобному благоверному князю Олегу Брянскому

Кондак 1

Возбранный воеводо православных и небесный заступниче Брянския земли, князей русских украшение и монахов похвало, обители первоверховных Апостол основателю и покровителю и о душах наших усердный молитвенниче, благодарственная пения приносим ти, глаголюще: Радуйся, преподобне княже Олеже, Брянский чудотворче.

Икос 1

Ангельския Силы радовахуся благочестию твоему, княже Олеже, еже измлада благодатию Божиею явил еси, благого корене благая отрасль быв. Мы же сорадуемся им и яко Божия избранника восхваляем тя сице:

Радуйся, благочестивых родителей благословенный плод;

радуйся, яко память твоя почитается в род и род.

Ра́дуйся, от ю́ности Христа́ Бо́га тёпле
возлюби́вый;

ра́дуйся, в се́рдце обита́ль Свято́му Ду́ху
угото́вивый.

Ра́дуйся, богослуже́нию усер́дно прилежа́вый;
ра́дуйся, Сло́вом Бо́жиим ду́шу свою́
пита́вый.

Ра́дуйся, преподо́бне кня́же Оле́же, Брянский
чудотво́рче.

Конда́к 2

Ви́дя и слы́ша пра́ведное жити́е благове́рных
сродни́ков твои́х, Черни́говских князе́й Нико́лы
Свято́ши и И́горя страсоте́рпца, му́ченика
Михаи́ла и роди́теля твоего́ Рома́на, е́ще же и
дщере́ Михаи́ловы преподо́бныя Евфроси́нии
Су́ждальския, потща́лся еси́, свя́те Оле́же,
подража́ти им, воспева́я Бо́гу: Аллилу́иа.

И́кос 2

Ра́зум богопросвеще́нный от ю́ности стяжа́в,
благове́рне кня́же Оле́же, не прельсти́лся еси́
су́етною сла́вою княже́ния земна́го, почита́я си́е
я́ко сугу́бое служе́ние лю́дем Бо́жиим,
вруче́нным попече́нию твоему́. Сего́ ра́ди
приими́ от нас сицева́я:

Ра́дуйся, лю́бовию о Христе́ исполнивыйся;
ра́дуйся, оте́ц чадолюбивый лю́дем явивыйся.
Ра́дуйся, печа́льных бла́гий утешителю;
ра́дуйся, в беда́х су́щим предста́телю.
Ра́дуйся, нищих и убо́гих пита́телю;
ра́дуйся, вдов и сирот покрови́телю.
Ра́дуйся, преподо́бне кня́же Оле́же, Бря́нский
чудотво́рче.

Конда́к 3

Си́лою Ду́ха Свята́го укрепля́емь, блаже́нне
кня́же Оле́же, в ми́ре сем живя́, собла́знов его́
удаля́лся еси́, уедине́нно в вертогра́де роди́телей
твои́х водворя́ясь; те́мже и утвержде́нию ве́ры
правосла́вныя ревну́я, пе́рвую в землі́ Бря́нстей
оби́тель во и́мя святы́х апо́стол Петра́ и Па́вла
основа́л еси́, да и́ноцы ея́ непреста́нно
воспева́ют Бо́гу: Аллилу́иа.

И́кос 3

Име́я богоприя́тное желáние от суеты́
мирскія удалитися, укрепил́ся еси́ в нем, егда́
и́ноцы создáнныя тобо́ю оби́тели вку́пе с
Пече́рскими принесо́ша от Ки́ева чудотво́рную
ико́ну Богома́тере, молéния ра́ди недугую́щаго

родителя твоего. Темже ублажающе изволение твое, вопием ти тако:

Радуйся, узкий путь Христов возлюбивый;
радуйся, богатство и славу мира
возненавидевый.

Радуйся, рuce на рало Господне возложивый;
радуйся, вспять лица твоего николиже
обративый.

Радуйся, Отчества Горняго достигнути
возжелевый;

радуйся, княжескую диадиму ради Небеснаго
венца оставивый.

Радуйся, преподобне княже Олэже, Брянский
чудотворче.

Кондак 4

Бурею напастей колеблемо отечество твое
зря, княже Олэже, агаряны и зловерными
разоряемо, еще же и междоусобными бранями
терзаемо, щитом веры православныя оградився,
и мечем молитвы вооружився, на враги изшел
еси, поя Спасителю Богу: Аллилуиа.

Икос 4

Слышав отца твоего, благовернаго князя
Романа, во благодарение за исцеление обитель

Свѣнскую основавшаго и вся, елики виде прозревшима очима, земли ей даровавшаго, себе самаго в жертву Богу принёс еси, святе Олёже, и во обитель сию вселился еси. Сего ради воспеваем тя сице:

Радуйся, взёмый крест свой и Христу последовавый;

радуйся, земныя почести ни во чтоже вменивый.

Радуйся, по заповеди Христовой смириыйся; радуйся, господин быв и служитель всем соделавыйся.

Радуйся, люботрудное житие избравый;

радуйся, в постѣ и молитвах пребывавый.

Радуйся, преподобне княже Олёже, Брянский чудотворче.

Кондак 5

Боготечней звездѣ уподобился еси, преподобне Олёже, егда от чертога княжеска во обитель первоверховных Апостол, яко в чертог Небеснаго Жениха, прешёл еси, о благостоянии Святыя Църкве, благоустроении отечества и спасении душ врученных ти Богом людей усердно моляся и со умилением поя: Аллилуиа.

И́кос 5

Ви́деша боголю́бивии лю́дие гра́да Бря́нска
пра́ведное жити́е тво́е, Оле́же богоно́сне,
попремно́гу чéствоваху щедрóты и по́двиги тво́я.
Ты же смиренномúдренно благодарéние Бо́гу
приноси́л еси́, сего́ ра́ди и Той тя просла́ви и
научи́ вёрныя воспева́ти та́ко:

Ра́дуйся, дух правы́я ве́ры укрепля́й;

ра́дуйся, ре́вность по Бо́зе возгрева́й.

Ра́дуйся, дея́нию богомы́слие приложивы́й;

ра́дуйся, тщесла́вие и горды́ню сокруши́вый.

Ра́дуйся, дрéвним отце́м единоправны́й;

ра́дуйся, Бо́гом и лю́дьми возлю́бленный.

Ра́дуйся, преподо́бне кня́же Оле́же, Бря́нский
чудотво́рче.

Конда́к 6

Пропове́дник ве́ры правосла́вныя и ревни́тель
благоче́стия сло́вом и жити́ем был еси́,
богоблаже́нне кня́же Оле́же, еди́нем бо
желáнием, подо́бно пра́деду тво́ему
равноапóстольному кня́зю Влади́миру, горéл еси́,
да вси лю́дие земли́ тво́ея присво́ятся Христу́ и
вкúпе с тобо́ю воспева́ют Ему́: Аллилу́иа.

И́кос 6

Возсия́л еси́ в де́брех, град Бря́нск о́крест
облежа́щих, я́ко у́тренняя заря́, и я́ко звёзды
небе́сныя, озари́ша зе́млю на́шу добродётели
твоя́, и́миже и ны́не просвеща́еши немол́чно
воспева́ющих тя си́ми похва́льными словесы́:

Ра́дуйся, во Све́те невече́рном пребыва́яй;
ра́дуйся, ду́ши на́ша чудесы́ просвеща́яй.

Ра́дуйся, сто́лпе о́гненный в пусты́ни греха́
блужда́ющим;

ра́дуйся, путево́дная звездо́ на Не́бо
ше́ствующим.

Ра́дуйся, нетле́нием телесе́ от Бо́га
почте́нный;

ра́дуйся, благода́тию Христо́вою облече́нный.

Ра́дуйся, преподо́бне кня́же Оле́же, Бря́нский
чудотво́рче.

Конда́к 7

Хотя́й по́двигом до́брым подвиза́тися и ве́ру
правосла́вную соблюсти́, преподо́бне о́тче
Оле́же, от си́лы в си́лу ше́ствовал еси́, укрепля́я
ум чтéнием Божё́ственных словес и жити́й
святы́х, и́мже подража́я, добродётели твоя́

сокры́ти от челове́к тща́лся еси́, воспева́я
Сердцеве́дцу Бо́гу: Аллилу́иа.

И́кос 7

Но́ваго тя чудотво́рца яви́ Госпо́дь в земли́
Ру́сской, Оле́же всечестне, тобо́ю святу́ю
правосла́вную ве́ру во гра́де Бря́нске утвержда́я,
и́же све́тло красу́ется, име́я тя Небе́снаго
засту́пника и предста́теля ко Го́споду, и с
любо́вию ти взыва́ет:

Ра́дуйся, Правосла́вныя Це́ркве во́ине
добропобе́дный;

ра́дуйся, Руси́ святы́я моли́твенниче кре́пкий.

Ра́дуйся, земли́ Бря́нския храните́лю;

ра́дуйся, Петропа́вловския оби́тели
огражде́ние.

Ра́дуйся, ересей и раско́лов разорите́лю;

ра́дуйся, душ и телес на́ших целите́лю.

Ра́дуйся, преподо́бне кня́же Оле́же, Бря́нский
чудотво́рче.

Конда́к 8

Стра́нно и дивно́ бысть жити́е твоё, о́тче наш
Оле́же, во оби́тели, егда́ игу́мен быв,
преподо́бному Феодо́сию Киево-Пече́рскому
подража́л еси́ и о́браз бра́тии в подви́жнических

трудѣх являл еси, вся послушания неленостно исполняя, во вретнице одеваяся, вмале на древяне ложи покой имея, паче же на всяк час неустанно вопия Богу: Аллилуиа.

Икос 8

Вся земля Брянская радостию духовною подвижесе, егда святыя мочи твоя, достохвальне княже Олеже, многолетне во время гонений богоборческих под спудом во обители твоей хранимыя, паки яви Господь верным людем Своим, вопиющим ти таковая:

Радуйся, сетей тлетворнаго греха избежавый;
радуйся, безстрастием душу украсивый.

Радуйся, яко мочи твоя во укрепление веры нам оставивый;

радуйся, освящение притекающим к ним подаваяй.

Радуйся, в мертвенном телеси жизнь благодатную являяй;

радуйся, от мощей твоих чудеса источаяй.

Радуйся, преподобне княже Олеже, Брянский чудотворче.

Кондак 9

Всякое естество Ангельское удивися крепости души твоея, богомудре Олеже, како совершен хотя быти, богатство яве и тайне расточил еси нуждающимся, и нищетою духовною обогатився, радостно Христу Спасителю последовал еси, поя Тому: Аллилуиа.

Икос 9

Ветийство человеческое не довлѣет по достоянню восхвалити труды, болѣзни и подвиги твоя, славне княже Олеже, яже спасения ради душевнаго подъял еси, чрез все житие неослабно плоть распиная со страстьми и похотьми. Мы же от простоты сердца любовью ублажаем тя сице:

Радуйся, во плоти аки безплотен на земли поживый;

радуйся, струями слезными огонь страстей угасивый.

Радуйся, терпением и кротостию диавола победивый;

радуйся, нищетою духовною одежду нетления стяжавый.

Радуйся, силу Воскресения Христова от мощей твоих проявляя;

ра́дуйся, зарю́ о́бщаго воскресе́ния нетле́нием
моще́й показу́яй.

Ра́дуйся, преподо́бне кня́же Оле́же, Бря́нский
чудотво́рче.

Конда́к 10

Спасти́ся душа́м на́шим моли́ Человеколю́бца
Бо́га, свя́те Оле́же, к тебе́ бо по Бо́зе и
Пресвяте́й Богоро́дице усер́дно прибега́ем, я́ко
ско́рому помо́щнику и те́плому ходата́ю о земли́
Бря́нстей и о всех правосла́вно в ней живу́щих и
воспева́ющих Го́споду: Аллилу́иа.

И́кос 10

Стена́ тверда́ и покрóв изряден был еси́ в
жити́и твоём и́ноком оби́тели твоея́: о́ваго у́бо
оте́чески назидая́, о́ваго крóтце обли́чая, ины́я
же с любóвию увеща́вая, не́ких страхом спаса́я,
наипа́че же пред кончи́ною твоёю вся ко
спасе́нию потре́бная запове́дал еси́ им. Те́мже и
нас грешных упаси́, да с любóвию зове́м ти:

Ра́дуйся, словесное ста́до от волко́в охраня́яй;
ра́дуйся, заблуждши́я о́вцы усер́дно
взыску́яй.

Ра́дуйся, мечу́ Бо́жий, душевредныя страсти
посеца́яй;

ра́дуйся, щито́м твои́х моли́тв нас огражда́яй.

Ра́дуйся, мона́хом в по́двизех укрепле́ние;

ра́дуйся, всем ве́рным лю́дем поможе́ние.

Ра́дуйся, преподо́бне кня́же Оле́же, Бря́нский
чудоотво́рче.

Конда́к 11

Пе́ние умиле́нное принёсл еси́ Пресвяте́й
Тро́ице в час кончи́ны твоея́, досточу́дне кня́же
Оле́же. Хвала́ Бо́гу благоде́йствующу, — глаго́лал
еси́, возлежа́ на сме́ртном одре́, зрю уже́ брег
мо́ря жите́йскаго, имже доселе́ ноша́шеся моя́
у́тлая ладия́. И со словесы́ си́ми ра́достно прешёл
еси́ во оби́тели Го́рния, иде́же со А́нгельскими
ли́ки поёши песнь вели́кую: Аллилу́иа.

И́кос 11

Светоприе́мную свещу́, у́глем благода́ти
возжже́нную, ви́деша ученицы́ лице́ твоё,
уго́дниче Бо́жий, во свято́м преставле́нии све́том
Небе́сным осия́нное. Сего́ ра́ди, скорбь
разлуче́ния с тобо́ю дивным сим утеше́нием
раствори́вше, с трéпетом и ра́достью взира́ху на

пречестны́я мо́щи тво́я и отше́ствие твоё
просла́виша зва́нии си́ми:

Ра́дуйся, земно́е течёние достохва́льне
сконча́вый;

ра́дуйся, по трудёх вре́менных поко́й вёчный
улучи́вый.

Ра́дуйся, вене́ц безсме́ртныя жи́зни приёмый;
ра́дуйся, Престо́лу Вседержи́теля предсто́яй.

Ра́дуйся, любо́вию твоёю нас не оста́вля́яй;
ра́дуйся, чту́щия тя ми́лостивно посе́щай.

Ра́дуйся, преподо́бне кня́же Олё́же, Бря́нский
чудотво́рче.

Конда́к 12

Благода́ть, да́нную ти, о́тче наш Олё́же, и
вёлие твоё дерзнове́ние пред Бо́гом ве́дуще,
приле́жно мо́лим тя: моли́ Ми́лостиваго Бо́га, да
сохрани́т Святу́ю Це́рковь от ересей, раско́лов и
нестро́ений, о́течеству́ нашему мир и
благодёнствие да да́рует, ве́рных же в
Правосла́вии и единомы́слии да утверди́т,
пою́щих Ему́: Аллилу́иа.

И́кос 12

Пою́ще дивное жити́е твоё и честное
преставле́ние, богоно́сне о́тче Олё́же, чтим

святую память твою, яко Небеснаго предста́теля и заступника, от Бо́га нам дарованнаго, и, припадающе к честнымъ мощемъ твоимъ, приносим ти сицевыя хвалы́:

Ра́дуйся, в житии сем Бо́гу угоди́вый;
ра́дуйся, Ца́рствие Небесное насле́дивый.

Ра́дуйся, яко с Го́рних высот на ны призираеши;

ра́дуйся, яко град Брянск и обитель твою́ покрываеши.

Ра́дуйся, пределов отечества на́шего за́щитниче;

ра́дуйся, хри́столюбиво́му во́инству поборниче.

Ра́дуйся, преподо́бне кня́же Оле́же, Бря́нский чудотво́рче.

Конда́к 13

О священная главо́, преподо́бне благове́рне кня́же Оле́же, приими́ сие́ ма́лое хваление от недостойных чад твои́х, и моли́твами твои́ми богоприятными Правосла́вие в земли́ Ру́сской утверди́, град Брянск и обитель твою́ сохрани́ и душамъ на́шим спасение испроси́, да с тобо́ю ны́не и во ве́ки воспева́ем Бо́гу: Аллилу́иа.

Сей конда́к чте́тся три́жды.

Та́же и́кос 1-й и конда́к 1-й.

Моли́тва

О преподо́бне о́тче, благове́рне кня́же Оле́же, уго́днице Христо́в усердны́й, моли́твенниче ко Го́споду те́плый, защи́тнице в беда́х и уте́шителю в печа́лех неуста́нный! Воззри́, преблаже́нне, ми́лостиво на град твой и виждь ча́да твоя́, смире́нно ти припа́дающая и служи́ти тебе́ хотя́щая. Не отве́ргни тре́бующия твоея́ по́моци, но, я́ко благоде́тель и ходата́й, моли́ присно Го́спода Бо́га и Спа́са на́шего Иису́са Христа́, да благослови́т страну́ Росси́йскую, в ми́ре и благове́рии ю́ сохраня́я, грады́ умножа́я, досто́яние Своё́ соблюда́я. Вознеси́, богоносне о́тче наш, сие́ ма́лое моле́ние недостойных раб твои́х Влады́це Христу́, да утверди́т во святе́й Правосла́вней Це́ркви живы́й дух пра́вья ве́ры и любве́, благоче́стие непоколеби́мо, любомудрие хри́стопосле́довательно, да да́рует па́стырем ре́вность попече́ния о спасе́нии люде́й, во е́же неверующия просвети́ти, заблуждшия наста́вити, отпа́дшия обрати́ти и привле́щи. Изряднее же, да вся ча́да Це́ркве Правосла́вныя

чи́сты сохра́ни́т от ми́рских искуше́ний, по́хотей плотских, суемуд́рия, суеве́рий и наважде́ний вра́жеских. Ей, уго́днице Бо́жий, не прэ́зри нас, моля́щихся тебе́, но помози́ нам ско́рым предста́тельством твои́м, да всяких бед, напа́стей и скорбе́й в сей жи́зни вре́менной избежа́вше, кончи́ну непосты́дну обрете́м, и тако́ на землѣ́ богоуго́дно пожив́ше, жи́зни райския́ на Небеси́ сподо́бимся, иде́же вку́пе с тобо́ю просла́вим человеколю́бие и щедро́ты в Тро́ице сла́вимаго Бо́га, Отца́ и Сы́на и Свята́го Ду́ха, во ве́ки веко́в. Ами́нь.

